

摘藻堂四庫全書薈要

集部

欽定四庫全書薈要卷一萬五千五百三十九

集部

劔南詩藁卷四十九

宋 陸游 撰

自嘲

僻學論交少貧居卜地偏
不逢方謝事垂老旋希僊
兀兀醒如醉昏昏晝亦眠
却慚農與圃一飽餞餘年

解嘲

一壑棲遲久多生習氣消
行藏無媿怍夢覺兩逍遙
倩

鶴傳山信疏泉洗藥苗晚來幽興極乘月過溪橋

野興

晨炊畬粟薦園蔬默計生涯已有餘舉世方誇稽古力
滿懷空貯活人書悶呼赤腳行沽酒出遣蒼頭旋餽驢
不為歸休習疎懶愛閒元與市朝疎

枕上

送盡小窻月數殘孤戍更清詩時自至幽夢久方成衣
杵斷還續燈花落復生細衾贖得暖紙帳不知明

遠遊

老子平生喜遠遊
流塵不惜閭貂裘
江亭吹笛三巴夜
關路騎驢二華秋
但使澄心同止水
自知幻境等浮漚
悠然飽聽松風睡
勾漏丹砂底用求

晚遊

垣屋參差出溝谿
曲折通亂鴟空際
黑落日竹間紅
輒輒輒竿語搖搖
旛腳風吾行本無
定隨意入空濛

夜坐

流落知聞絕歸休寵辱空酒狂寧限老詩思正須窮活
火生新焰殘燈委碎紅平生會心處正在兀然中

酒熟醉中作短歌

陸子壯已窮百計不救口蜀道如上天十年厭犇走還
鄉困猶昨負郭無百畝雖云饑欲死亦未喪所守虛名
一畫餅陳迹幾芻狗但思從壯士大獵雲夢藪長戈白
如霜爛漫載牛酒箭穿乳虎立車麟蒼兕吼歸來數禽
獲毛血灑戶牖人生貴適意富貴安可苟

冬夜讀書有感

落葉殘蕪又一冬，老人光景易怱怱。
不論病惰耕桑業，但恨貧分學問功。
馬昔騰驤離冀北，鶴今憔悴返遼東。
六經未與秦灰冷，尚付餘年斷簡中。

散步湖上至野人家

湖上霜高水落時，一藤信步出尋詩。
妄誇強健真堪笑，喚作清閒亦自欺。
西埭又隨牛迹去，東村常望鶴巢知。
漁翁留客頻辭謝，雞瘦難烹酒味漓。

對食戲詠

癭榼傾桑落毫杯點雨前
冰梨頰似頰霜栗大如拳
洗脯烹蔬甲攜鉏斲筍鞭
餘年只此是切勿念腥羶

昨非

溫飽從來與道違
書生只合卧牛衣
老狐五百生前錯
孤鶴三千歲後歸
舌自生肥勝玉食
腰常忘帶況金圍
一官彭澤曾何有
元亮還家悔昨非

遂初

貧士善用短屏居常自如出尋鄰叟語歸讀古人書過
店亦沽酒登山時跨驢非關傲塵世聊欲遂吾初

小雨偶出隣里小兒競隨吾後不知其意何也

雲生海澨初飛雨日漏山椒旋作晴箬笠芒鞋橋下路
兒童爭逐放翁行

書喜

堪笑龜堂老更頑天教白髮看青山家居禹廟蘭亭路
詩在林逋魏野間略計未嘗三日醒細推猶得半生閒

今年况展南湖面朝借樵風莫可還

時方有朝命復鏡湖

書房雜書

歛版一何久懸車已後時狂醒醒始悔窮獨老方知世
外乾坤大林間日月遲猶須采藥去不媿鹿門期

又

面槁髮鬢髻衰殘百不能夜房侵戶月晨硯滿池冰藥
債多於酒蔬餐薄過僧年深拄杖折自斫澗邊藤

寒夕

夜扣銅壺徹旦吟了無人會此時心燈殘焰作孤螢小
火冷灰如積雪深風急江天無過雁月明庭戶有疎砧
此身畢竟歸何許但憶藏舟黃蘗林

讀經

半升粟飯養殘軀晨起衣冠讀典謨莫謂此生無用處
一身自是一唐虞

讀史

民間斗米兩三錢萬里耕桑罷戍邊常使屏風寫無逸

應無烽火照甘泉

讀劉蕡策

志士仁人

一作人人

氣薄雲唐家惟有一劉蕡看渠放逐蛇

龍手那肯驅蠅與拍蚊

雨霰作雪不成大風散雲月色皎然

數間茅屋寄蓬蒿天遣來歸息我勞月可一庭陳素練
風酣萬木起驚濤病侵齒髮才雖盡酒挾江山氣尚豪

安得人間掣鯨手共提筆陣法莊騷

韓文公以騷配莊
古人論文所未嘗

也及

中夜苦寒

困窮全素節，羸老愈剛腸。
報國永無日，飯蔬那自傷。
布衾如鐵冷，冬夜抵年長。
推枕歌梁甫，中庭月似霜。

示子孫

為貧出仕退為農，二百年來世世同。
富貴苟求終近禍，汝曹切勿墜家風。

又

吾家世守農桑業一挂朝衣即力耕汝但從師勤學問
不須念我叱牛聲

早梅

東塢梅初動香來託意深明知在籬外行到却難尋

縱筆

晨炊躬稼米夜讀世藏書俯仰無多媿心知死有餘

又

破困供飯足陋屋著身寬小蹇勤芻秣時時一跨鞍

歲莫雜感

衰髮如枯管殘齒如敗屐取米鬻薄糜便足度晨夕欲
知死遠近不必訊龜策四序忽已過如數堠雙隻發裝
陌上亭具食水邊驛會當一日歸豈有終作客

又

天風吹雪片大者如飛鷗豈惟平溝坑直恐糞馬牛百
錢買薪蒸千錢贖褐裘雖無狐貉溫要免溝壑憂小兒
為我言幸可具杯甌園蔬亦復佳過足翁豈求

又

歲盡霜雪稠相望僵萬木天豈私梅花獨畀此芬馥高
標我自有何憾老空谷人言和羹實晚或參鼎餽哀哉
世論卑汙我塵外躅誰能蒔袂之寫真配修竹

又

我少雖嗜書賦性實慵惰初志略未酬白髮已無那吾
兒猶好勇世事如棄唾呻吟編簡中徹旦或未卧爾來
愈自勵日讀易一過勉終大學功吾道要負荷

自責

晨起登堂正幅巾蕭然聊欲養吾神凡心未免更詩字
習氣猶思議古人買屨為登山寺去徹燈緣愛月窻新
何時一切消除盡終作無懷上古民

懷舊用昔人蜀道詩韻

曩自白帝城一馬獨入蜀晝行多水湄夜宿必山麓時
聞木客嘯常憂射工毒蜿蜒蛇兩頭蹠蹠夔一足豈惟
耳目駭直恐性命促稍歷葭萌西遂出劒閣北奴僮不

敢訴馬病猶盡力我亦困人客一日帶屢束最憶蒼溪
縣送客一亭綠豆枯狐兔肥霜早柿栗熟酒酸壓查梨
妓野立土木主別意益勤我去疲已極行行求旅店借
問久乃得溪聲畲歌長燈焰照影獨村深寒更甚薪盡
燒簣竹須臾風雨至終夕苦漏屋於時厭道途自誓棄
微祿猶幾三十年始謝祝史職予四竊祠祿乃謝事君思念篤老
內閣使寓直亦思秋豪報力憊執黍稷却尋少時書開
卷有慙色

出遊

僧院軒窗酒市樓過門自入不須留恰來竹下尋棋局
又向沙邊上釣舟詩放不能諧律呂書狂猶足走蛟虬
秦碑禹窆風烟外一弔興亡萬古愁

辛酉冬至

今日日南至吾門方寂然家貧輕過節身老怯增年

鄉俗

謂喫冬至飯
即添一歲

畢祭皆扶拜分盤獨早眠惟應探春夢已

繞鏡湖邊

冬至後一日書

霜霰新冬後年齡大耋時功名久無夢文字略存詩丘
壘歸何憾琴書付有兒癡人癡到底更欲數期頤

客至

何處軒車客能來桑麥村一奴先入市此老自簷門野
果嘗皆澀村醅壓尚渾殘年亦何恨治世作黎元

子聿入城

小硯寒生凍孤燈翳復明衰翁守微火稚子隔重城日

落林無影舟行水有聲詩家忌草草得句未須成

降魔

老閱人間久曾降百萬魔悲憂誠害性喜悅亦傷和省
事常須勉忘懷得最多當年未知此無奈月明何

冬日

故里躬耕後頽齡老及前開門無客至得句有僧傳忽
忽身如夢迢迢日似年會當乘小雪夜上剡溪船

又

客至惟清坐真貧不是慳援琴排遣悶合藥破除閒引
鶴時穿屐逢梅一破顏怪來寒徹骨夜雪冒南山

客去

相對蒲團睡味長主人與客兩相忘須臾客去主人覺
一半西窗無夕陽

自勉

妄出真成錯歸耕惜已遲褐溫貧始覺飯美淡方知身
外元無易情中自有詩窮源那得止瞑目以為期

又

自信直如弦殘年偶得全老猶嗤佞佛貧亦諱言錢旦
莫勤鞭策塵埃痛洗湔仍須語兒子此事要家傳

又

臂弱傳鈔少心煩記問衰讀書猶自力愛日似兒時章
句分無憾聲形講不遺明年幸強健閉戶有餘師

又

歸老寧常逸時時學荷鋤室雖無長物圃尚有餘蔬壯

志誠哀矣貧居亦晏如為農當世業安用築門閭

午晴至園中

老不禁寒起每遲出門蕭散午晴時春回九地梅先覺
霜實千林竹不知藥圃采苗芒屨濕石泉照影角巾欹
歸來未過西簷日袖手悠然獨詠詩

七姪歲莫同諸孫來過偶得長句

雨墊林宗一角巾蕭條村路竝烟津四朝遇主終身困
八世為儒舉族貧行摘殘蔬循廢圃卧聞饑雀噪空囷

封胡羯末皆佳甚
剽喜團藥一笑新

苦寒

終日頻添季子裘
經旬不上仲宣樓
摩挲酒榼雖堪喜
疎索梅花未免愁
正苦冰生退吟筆
却思雪作潤耕疇
乘除擾擾殊多事
獨擁青氈覓睡休

閒中書適

棋廢機心息
書捐美睡多
客來時淡話
酒後亦高歌
甚欲江湖去
無如老病何
平羌半輪月
依舊照漁蓑

又

乞得殘骸久天涯一禿翁
瓢分春瓮綠甌絕太倉紅
短褐便冬暖長歌樂歲豐
老腰那可折步步賴枯筇

復湖

世事相尋敗與成湖中畚鍤浩縱橫
共知陂壞行當復敢恨臺高既已傾

小隱山園在湖中近聞亭觀皆廢

天鏡忽看孤月墮

樵風長送片帆輕下臨萬頃如雲稼
從此年年有頌聲

梅花絕句

體中頗覺不能佳
急就梅花一散懷
衝雨涉溪君會否
免教塵土浣青鞋

又

高韻知難折
簡呼溪頭掃地置
芳壺梅如解語應惆悵
昔日名流一箇無

又

折得梅花古渡頭
詩凡却恐作花羞
清樽賴有平生約
爛醉千場死即休

又

疎枝冷蘂誰能畫楊叟江西舊擅名今日東窻閒拂拭
去人一尺眼先明

跋馮氏蘭亭

堂堂淮陰侯夫豈噲等伍放翁評此本可作蘭亭祖唐古

石刻
本

又

繭紙藏昭陵千載不復見此本得其骨殊勝蘭亭面

山中

舊本山谷有句云
俗書喜作蘭亭面

十二月二日夜夢與客竝馬行黃河上憩於古驛
竝轡徐驅百里中雲開太華翠摩空是間合有神靈在
七十餘年路不通

又

河濱古驛闢重門雉兔紛紛黍酒渾吾輩豈應徒醉飽
會傾東海洗中原

倚樓

初三日

莫雲細細鱗千疊新月纖纖玉一鉤
歎息化工真妙手衝寒來倚水邊樓

讀書

先親愛我讀書聲追慕慈顏涕每傾
萬事到前心盡嬾一編相向眼偏明
致君正使違初志為己猶當畢此生
更祝吾兒思早退雨蓑烟笠事春耕

讀史

夜對遺編歎復驚古來成敗浩縱橫
功名多向窮中立

禍患常從巧處生萬里關河歸夢想千年王霸等棋枰
人間只有躬耕是路過桑村最眼明

閒遊

已破梅花一兩枝竝溪穿塢每歸遲老軀健似中年日
鄉俗淳如太古時上疏清狂非復昔據鞍矍鑠欲誇誰
一端尚被鄰翁笑無事長吟費撚髭

日莫

樸學無關道廢興更堪衰與病相乘眼看白日西南去

繩繫膠黏總不能

省事

老去終年臥草廬
事皆省盡略無餘
塵留鼠跡猶嗔拂
風作瓢聲固不除
興發舊醅何害醉
詩成拙筆亦堪書
投牀睡美悠然覺
作計今知本不疎

雪中作

鬢毛無奈歲華催
一笑登臨亦樂哉
平地忽成三尺雪
遶湖何啻萬株梅
雲山疊疊朝憑閣
簾幙沉沉夜舉杯

節物鼎來方自此酥花綵勝待春回

夢韓无咎王季夷諸公

積雪欲照夜老雞方唱晨諸公逝已久幽夢忽相親話
舊慙懃意追歡見在身悠然又驚覺撫枕一悲辛

晴窗讀書自勉

今日雪始晴遠舍烏烏樂老來少睡眠雖病亦早作豈
無案上書可與共寂寞弦歌始風雅次第窺灝噩高明
仰河漢曲折窮脉絡唐虞誠未遠洙泗亦如昨委佩聞

都俞避席承博約膏肓幸施砭幽閔欣納鑰天全魯壁
藏不墮秦火虐吾生百世餘其敢負所託

冬夜讀史有感

短檠膏涸夜將殘感事懷人興未闌酌酒淺深須自度
圍棋成敗有傍觀斷齏作飯終年飽大布裁袍稱意寬
世上閒愁千萬斛不教一點上眉端

大寒

大寒雪未消閉戶不能出可憐切雲冠局此容膝室吾

車適已懸吾馭久罷叱拂塵取一編相對輒終日亡羊
戒多岐學道當致一信能宗關里百氏端可黜為山儻
勿休會見高岑律頽齡雖已迫孺子有美質

自詠

滿梳晨起髮凋零亭午柴門未徹扃萬事忘來尚憂國
百家屏盡獨窮經楠枯倒壑雖無用龜老揜牀故有靈
夢裏騎驢華山去破雲巉絕數峰青

十二月十二夜夢
實有此故識之

晚興

斲芋挑蔬自鬻羹雪簷收滴莫寒生不嫌終日無來客
時聽荒園斲木聲

雪後寒甚

日破重雲出春從淺步來未融樓北雪先綻水南梅屏
護清吟硯缸鳴乍熟醅平生羨李愬入蔡夜銜枚

雪晴步至舍傍

雪消還似雨冰釋旋成泥視菜荒陂北尋梅小塢西牆
陰新犢卧庭際午雞啼幽興殊無極歸來日已低

訪隱者

湖曲有隱者時時容叩門人如釣渭叟地似避秦村笑
語囂塵遠衣冠古製存山寒歸路晚相與盡瓢樽

村野

村野易過日閉門心自欣一身猶逆旅萬事固浮雲病
厭詩為崇閒憑酒策勲灌園雖舊業隨事不須勤

初夜

初夜多幽興危闌偶獨憑月陞星盡沒風勁雪重凝身

似遊邊客心如退院僧
奇寒不可耐歸對北窗燈

雙松

父老言紹興中所植

東岡天矯兩蒼龍
千尺蟠空黛色濃
六十餘年松若此
誰知我更老於松

兀兀

兀兀孤村客悠悠
兩世人夢忘身潦倒醉覺膽輪囷
故里簪纓換都門巷陌新
聞臨安火後興葺漸畢
餘年猶有幾撫事

一傷神

殘厯

殘厯不盈紙苦寒侵弊裘
歲猪鳴屋角儺鼓轉街頭未
死猶當學長貧肯復憂雪晴
農事起且復議租牛

戒言

饒舌憂患始銘膺勸戒深談空
摩詰默對酒子光瘖久已忘
齊語何嘗解越吟悠然嫌未足
更撫絕絃琴

聞松風有感

重位每憂身後罵虛名不救眼前饑
直須采藥名山去

日夜松風無歇時

遣興

侯印從來非所圖
赤丁子亦不容呼
著低怯對新碁敵
量減愁逢舊酒徒
生世豈能常役役
酣歌且復和鳴鳴
扁舟到處皆吾境
莫問桐江與鏡湖

又

家住城南剡曲傍
門前山色蘸湖光
三朝執戟悲年往
二頃扶犁樂歲穰
名姓已隨身共隱
文辭終與道相妨

子孫勉守東臯業小甌吳粳底樣香

有道流過門留與之語頗異口占贈之

萬里縱橫自在身偶然來看剡溪春
取將月去閒娛客攜得雲歸遠寄人
縮地不妨遊汗漫移山隨處對嶙峋
須君更出囊中劍一為關河洗戰塵

閒記老境

謝事久懸車為農嬾荷鋤
破裘寒旋補殘髮短猶梳槁
木忘榮謝閒雲任卷舒
心知老當逸先罷夜觀書

又

嫌鬧不入市怕寒稀出門擁爐愁兀兀投枕睡昏昏柳
色新如染梅花香滿村猶嗟未免俗薄酒誑空樽

小飲梅花下作

脫巾莫歎髮成絲六十年間萬首詩

予自年十七八學作詩今六十年得

萬篇排日醉過梅落後通宵吟到雪殘時偶容後死寧非
幸自乞歸耕已恨遲青史滿前閒即讀幾人為我作著

龜

門外野望

十二月二十五日

野迥浮烟碧門深反照紅
柳邊雙鷺渚天際萬鴟風
僧
唄家禳疫神船社送窮豐
年隨處樂忘却鬢如蓬

自題傳神

識字深村叟加巾下版僧
檐挑雙草屨壁倚一烏藤
得
酒猶能醉逢山未怯登
莫論明日事死至亦騰騰

僧頌云今

日騰騰任運明日任運騰騰

歲莫貧甚戲書

阿堵元知不受呼忍貧閉戶亦良圖曲身得火纔微直
槁面持杯祇暫朱食案闌干堆首宿褐衣顛倒著天吳
誰知未減麤豪在落筆猶能賦兩都

晚晴閒步隣曲間有賦

湯沐身輕念出遊近春原野霽烟浮樓陰雪在玉三寸
雲罇月生銀一鈎窮巷客稀常足睡莫年詩退不禁愁
鄉隣無事冬耕罷獨倚籬門數過牛

誦書示子聿

乃翁誦書舍東偏吾兒相和山之巔翁老且衰常早眠
兒聲夜半方冷然楚公著書數百編少師手校世世傳
我生七十有八年見汝任此寧非天

又

易傳三聖至仲尼炎炎秦火乃見遺經中獨無一字疑
正須虛心以受之世衰道散吁可悲我老欲學無碩師
父子共讀忘朝饑此生有盡志不移

十二月二十九日夜半雨雪作披衣起聽

臘雪瑞豐登春雨相發生二者皆可賀愛此打窗聲披
衣起靜聽蕭蕭亂疎更豈惟肺渴蘇耳目為一清孤燈
不結花相對翳復明明朝遂除夕歲月驚崢嶸

辛酉除夕

衰境遇白雞自分墮幽墟造物偶見寬俯仰復歲除駸
駸迫耄期凜凜無根株孰知尚堅頑壯者有不如銅瓶
垂碧井手自浸屠麻松煤染兔穎秉燭題桃符登梯挂
鍾馗祭竈分其餘僮奴歎我健却立不敢扶新春無五

日節物傾里閭羅旛挿紗帽一醉當百壺


除夕

六聖涵濡作幸民明朝七十八年身門前西走都城道
卧看無窮來往人

劔南詩豪卷四十九

謹案卷四十八第二十一頁後七行憶昨王師戍
隴回按唐宋詩醇憶昨作昨夜





總校官庶吉士臣張能照

校對官庶吉士臣翟槐

謄錄貢生臣王嘉稷

欽定四庫全書薈要

集部

劔南詩薈卷

五十一

詳校官助教臣謝登雋



欽定四庫全書薈要卷一萬五千五百四十

集部

劔南詩豪卷五十

宋 陸游 撰

開歲

綵襦新畫衛門扉
賀剌相欺可累歛
賣困不靈仍喜睡
送窮無術又來歸
相尋蠶市人何在
爛醉墓津事亦非
惟有禹祠春漸好
從今剌判典春衣

蠶市成都正月初故
事墓願津在眉山

亦邦人正月
宴遊之所

箕卜

孟春百草靈古俗迎紫姑厨中取竹箕冒以婦裙襦豎
子夾扶持插筆祝其書俄若有物憑對會不須臾豈必
考中否一笑聊相娛詩章亦間作酒食隨所須興闌忽
辭去誰能執其祛持箕畀竈婢棄筆臥牆隅几席亦已
徹狼籍果與疏紛紛竟何益人鬼均一愚

梅花絕句

幾年不到合江園說著當時已斷魂只有梅花知此恨

相逢月底却無言

又

當年走馬錦城西
曾為梅花醉似泥
二十里中香不斷
青羊宮到浣花溪

又

聞道梅花圻曉風
雪堆遍滿四山中
何方可化身千億

一樹梅前

一作花

一放翁

又

小亭終日倚闌干樹樹梅花看到殘只怪此翁常謝客
元來不是怕春寒

又

亂簋桐帽花如雪斜挂驢鞍酒滿壺安得丹青如顧陸
憑渠畫我夜歸圖

又

紅梅過後到緗梅一種春風不竝開造物無心還有意
引教日日放翁來

立春前一日作

壬戌開歲
四日立春

開年化日已舒長
漸見風和鳥變吭
冒土萱芽抽嫩綠
拂橋柳色弄輕黃
重溫壽酒屠蘇釀
探借春盤餅餌香
不入城門今幾歲
遙知車馬正匆忙

立春日

日出風和宿醉醒
山家樂事滿餘齡
年豐臘雪經三白
地暖春郊已遍青
菜細簇花宜薄餅
酒香浮螳瀉長瓶
湖村好景吟難盡
乞與侯家作畫屏

送子龍赴吉州掾

我老汝遠行知汝非得已
駕言當送汝揮涕不能止
人誰樂離別坐貧至于此
汝行犯胥濤次第過彭蠡
波橫吞舟魚林嘯獨腳鬼
野飯何店炊孤擢何岸
樣判司比唐時猶幸免笞
箠庭參亦何辱負職乃可
恥汝為吉州吏但飲吉州
水一錢亦分明誰能肆讒
毀聚俸嫁阿惜擇士教元
禮我食可自營勿用念甘
旨衣穿聽露肘履破從見
指出門雖被嘲歸舍却睡
美益公名位重凜若

喬嶽峙汝以通家故或許望燕几得見已足榮切勿有
所啟又若揚誠齋清介世莫比一聞俗人言三日歸洗
耳汝但問起居餘事勿挂齒希周有世好敬叔乃鄉里
豈惟能文辭實亦堅操履相從勉講學事業在積累仁
義本何常蹈之則君子汝去三年歸我儻未即死江中
有鯉魚頻寄書一紙

正月五日出遊

久作閒人不慣愁新春天氣更清柔未為遼海千年別

且繼斜川五日遊細柳拂頭穿野徑落梅黏袖上漁舟
此身定去神仙近倚遍江南賣酒樓

六日雲重有雪意獨酌

遍遊數澤一漁舸盡歷風霜只緼袍天為念貧偏與健
人因見嬾誤稱高地連海溼濤聲近雲冒山椒雪意豪
偶得名罇當痛飲涼州那得直蒲萄

閒甚戲作

酒盡枵樽腹書拋委架塵漸能閒過日始覺老催人玉

塵王夷甫金龜賀季真若論方外事終媿葛天民

莫笑

莫笑窮閭叟人生亦已稀衆中容後死險處得先歸初
服還韋布晨飧美蕨薇牀頭周易在捨此復疇依

初春雜興

戲續春寒賦閒賡午醉詩煎茶小石鼎酌酒古銅卮曝
日龜浮沼營巢鵲墮枝村深無客過幽興與誰期

又

水長鷗初泛山寒茗未芽
深林聞社鼓落日照漁家
渡遠呼船久橋傾取路斜
客愁慵遠眺不是怯風沙

又

問途來野店秣蹇憩山郵
何處無詩思平生慣旅愁
翩翾下鷗鷺點點散羊牛
傳入王孫畫千金未易酬

又

故歲愁聽雨新春剗得晴
暖催紅藥鬧漲入綠池平
遊馬行爭路華燈賣滿城
江村獨無事戶戶及時耕

又

老病倦遊陟偶尋溪友期殘水擁魚笥新暖入桑枝山
崦巨然畫煙村摩詰詩何人為收拾媿我不能奇

春曉

喔喔雞號野昏昏月挂樓夢隨殘漏斷愁伴宿醒留壯
士看清鏡春寒著弊裘拂窻新柳色最憶錦江頭

書感

投老羈孤久臨觴感慨頻關河疎舊友風雨敗新春事

固少如意天終能勝人所悲頭上髮不與柳條新

壬戌正月十四日

老子居然健上元如許晴湖平波不起天濶月徐行散
髮漁舟穩臨風野笛清安能擁笳鼓萬里將幽并

十五日

誰推圜鏡上天東桂影婆娑滿鏡中天宇更無雲一點
譙門初報鼓三通兒童艸艸杯盤喜鄰曲紛紛笑語同
逐祿豈能無聚散明年誰復伴衰翁

高枕

高枕閒看古篆香
世間萬事本茫茫
偶亡塞馬寧非福
太察淵魚恐不祥
每與諸兒論今古
常思百世業耕桑
危機正在黃金印
笑殺初心繆激昂

送施武子通判

初入修門鬢未秋
安期千里接英遊
退歸久散前三衆
邁往欣逢第一流
只道升沉方異趣
豈知氣類肯相求
龍鍾不得臨江別
目斷西陵煙雨舟

老學菴自規

堯德被四表其本在身修江河水稽天發源乃涓流人
忍於搏蝨習熟且解牛象箸與玉杯漆器實其由斯須
失兢畏惡名溢九州始乎為善士終可蹈軻丘孰置汝
太山孰擠汝污溝降福孰汝私得旤孰汝讎聖狂在一
念旤福皆自求易簣汝所知垂死勿惰偷

雨夜

斷岸輕煙著柳條孤村小雨夜蕭蕭荒雞隔浦聲相續

短燭無風焰自搖朴學元知縻歲月殘生竟是老漁樵
最憐鬢畔千莖雪日日春風吹不消

子聿以剛日讀易柔日讀春秋常至夜分每聽之
輒欣然忘百憂作長句示之

朱顏已去鬢絲稠知復人間幾歲留正可牀頭著周易
安能車上說春秋齏鹽日昃從兒好弦誦更闌解我憂
時發一言常中理絕勝問事不能休

記夢

信命從來不問天
經旬無酒亦陶然
夢為估客揚州去
水調聲中月滿船

夜賦

八十衰翁久挂冠
今年無酒敵春寒
亂雲入戶雨方急
斷雁呌羣燈未殘
蠹簡幸存隨意讀
蝸廬雖小著身寬
支離自笑心猶壯
憂國憂家慮萬端

杜叔高秀才雨雪中相過留一宿而別口誦此詩
送之

久客方知行路難
關山無際水漫漫
風吹欲倒孤城遠
雪落如簷野寺寒
草挈衣囊投土室
晨沽村酒挂驢鞍
文章一字無人識
胸次徒勞萬卷蟠

曉賦

雞晨非一鳴
鵲旦每三鳴
萬物各有役
吾生何所營
書編猶未掩
窻紙已微明
穉子勇過我
琅琅誦易聲

雪後龜堂獨坐

丈夫自重如拱壁
安用人看一錢直
簞食豆羹不虛受

富貴那可從人得讀書萬卷行媿心幽有鬼神為君惜
龜堂樂處誰得知紅日滿窗聽雪滴

又

兩手龜坼愁出袖閉戶垂帷坐清晝朝陽破雲雪漸消
點滴無窮聽簷溜士生百行雖相補第一要能安飯糗
詩書幸可教兒童勿使後人憐晚謬

又

牙齒欲落何足惜爛鬻藜羹自堪食屋穿不害氣吐虹

客至從驚瘦如腊天公鑄汝亦已至春風裂面雪三尺
濁醪傾罷仰屋歌尚友孫侔與徐積

又

閉門屋漏不可居出門雪泥深尺餘興闌已回剡溪櫂
路滑罷借東家驢竹窻兀兀無與語澆愁賴有酒一壺
眼花耳熱睡至夜吹火起讀殘編書

二月一日作

狼籍梅花委道傍山櫻已復占年光簷消積雪時聞滴

衣覆殘爐賸得香老馬已衰寧識路寒龜未死且搯牀
柴荆終日無來客賴有陶詩伴日長

過東鄰歸小憩

藍輿過鄰曲綠野喜新晴暖日生花氣豐年入碓聲築
陂鄉竭作買犢戶深耕歸舍還尋睡殘書傍枕橫

寄呂子和南廂

聖代多名德君家不乏公還看短袍綠來蹋軟塵紅小
忍便無事力行方有功官閒能念我時寄尺書東

自述

藜藿安貧陋柴荆俯莽蒼露著朝筮易掃地晝焚香美
睡天教嬾長歌客恕狂歡然送餘日醉死亦何傷

呂氏子夔郎求詩

乃祖身兼將相崇諸孫玉立有家風此郎已復塵埃外
它日相期氣類中行已勤勤須自省讀書疊疊要新功
果能哮吼如獅子一瓣香應嗣放翁

新晴

兼旬不雨亦常陰一日新晴抵萬金浦面波紋春穀細
橋頭柳色麴塵深關山滿眼愁千斛歲月催人雪一簪
猶有強寬懷抱處午窗睡起聽鳴禽

晚步湖堤歸偶作

酒盡知難折簡呼出門仍苦要人扶殘梅委地香誰惜
歸雁穿雲遠欲無日落牛羊猶被野農閒畚鍤正開湖
還家寂寞西窗晚旋燎枯枝擁地爐

春來食不足戲作

飢臥誰能羨屬餒高懷飽食豈容兼外司祿在終難取

卿監致仕當得分司祿須自請乃給遂置之

東帛恩深獨不霑

頃有敕令賜致仕者粟帛

羊酒郡獨格不行

衰謝形容無藥駐犇馳日月欠膠黏兒童拍

手看翁醉山杏溪桃簇帽簷

散步湖隄上時方濬湖水面稍渺瀰矣

老覺人間萬事輕不妨閒處得閒行西山鳥沒暮雲合
南浦隄平春水生孤操不渝無鶴怨淡交耐久有鷗盟
先民幸處吾能勝生長兵間老太平

邵堯夫自謂生於太平老於太平為

太平之幸民彼豈知幸哉若予生
於亂離乃老於太平真可謂幸矣

老學菴

老學衡茅底秋毫敢自欺開編常默識閉戶有餘師大
節難危見真心夢寐知唐虞元在眼生世未為遲

春晚

強尋殘夢苦難成推枕捲藤繞舍行新漲生波漁艇活
晨曦送暖寒衣輕煙迷芳艸蒼茫色鵲占高枝嘆喈聲
老病自憐猶嗜學誦書家塾羨諸生

新館一客諸孫晨
興入學誦書頗盛

龜堂雨後作

澤國春多雨，龜堂病少惊。
雖名舊朝士，其實老耕農。
一點葦間火，數聲煙外鐘。
詩材故不乏，處處起哀慵。

書感

我欲哭窮途，所懼世俗驚。
出門復入門，掩淚且吞聲。
唐虞邈難繼，周孔不復生。
承學百世下，我輩責豈輕。
楊墨斥已殫，釋老猶縱橫。
拔本塞其源，力盡志未平。
吾道如皦日，薄食終必明。
一木雖獨立，可支大厦傾。
夷風方變

夏孰能作長城卓哉易簣公垂死猶力行

後書感

貧賤終身志不移閉關涵泳賴書詩唐虞未遠如親見
周孔猶存豈我欺力學正須忘寢食少年誤計事文辭
爾來朋友皆雲散考質從誰盡所疑

村居書喜

紅橋梅市曉山橫白塢樊江春水生花氣襲人知驟暖
鵲聲穿樹喜新晴坊場酒賤貧猶醉原野泥深老亦耕

最喜先期官賦足經年無吏叩柴荆

中春偶書

鄰曲祈蠶候陂塘浸種時春寒薪炭覺雨霽鼓鐘知驢
瘦衝泥怯魚驚食釣遲衰翁一味嬾耕養媿吾兒

夜泊

小聚近江干中春尚爾寒釣船隨鷺宿煙月伴鐘殘冉
冉歲時速茫茫天地寬推篷一搔首無處著悲歡

東岡櫻桃已過殊不知

病著寒侵怕出門蕭蕭煙雨暗江村一樽闕與梅花別
過盡櫻桃不足言

別嚴和之

器之魂逝已難招尚有和之慰寂寥今夜月明空歎息
想君孤棹泊溪橋

又

千里風煙行路難旅舟應過子陵灘人間富貴知何物
莫負君家舊釣竿

齋中雜題

湖水日益長柳色日益深好鳥西山來飛鳴過前林年
華挽不留陳迹曠難尋花開少共賞酒熟惟孤斟王謝
今編氓曲水空山陰一樽欲弔古已矣予何心

又

屯雲失南山三日吹細雨歲月不貸人鼃聲遽如許一
年復一年老至不可禦下溼病在脾餘息僅如縷枯皮
裹瘦骨半屬松下土屋壞要當顛安能强撐拄

又

書生每苦飢得飯已可賀黃齋三百瓮自是天所破有時尚不繼得米無暇簸昨者雪塞門煙絕但僵臥雖云迫溝壑老學不敢惰夜分喚隣翁我歌爾當和

又

西窻日過中飢坐生眼花援筆課小詩墨燥字傾斜須臾忽滿紙翩翩若風鴉雖無古人法簡拙自一家乃知雨漏壁未媿錐畫沙俄報豆飯熟投筆喜莫涯呼童拾

澗薪試我家山茶

春晚

萍葉青浮水蛙聲鬧徹明川雲時聚散天氣半陰晴杏
子爭梅結鳩巢後鵲成吾儕亦有役過社更深耕

社日小飲

人生當借老年時醉挿山花壓帽欹世事恰如風過耳
微聾自好不須治

山茶

雪裏開花到春晚世間耐久孰如君憑闌歎息無人會

三十年前宴海雲

成都海雲寺山茶開故事宴集甚盛

春夜

寂寂春將暮迢迢夜未央膏殘燈焰短杵急藥塵香困
思棲雙曉羸軀寄一牀養慵新有味初志悔軒昂

春遊

右軍不復見清真賞會猶須我輩人幽夢斷時雞唱曉
短章成處鳥呼春出山茶筍村墟闌上市蓴鱸七筋新

速覓一壺隨處醉
風吹紅紫半成塵

北窻睡起

杏梢紅溼晝初長
睡過窻間半篆香
久厭客遊歸自好
本無才術老何傷
依蒲不去羣魚樂
點艸還驚小蝶忙
堪笑放翁無一事
強將詩句占年光

北窻懷友

中年妄意慕軻雄
白首終希尺寸功
落落要居流俗外
兢兢恐墮異端中
仰天俯地猶多媿
飯豆羹藜已過豐

幸有北窓堪講學故交零落與誰同

舟中作

娥江西路石帆東身寄鷗波浩蕩中
疊疊沙痕留浦岸疎疎日影透漁篷
詩人無復同盟在酒債何時一洗空
已迫耄年宜易感人生五十即稱翁

又

晤語無人與遣愁出門聊復弄輕舟
山穿煙雨參差出水赴陂塘散漫流
隔葉雄雌鳴谷鳥傍林子母過吳牛

數家清絕如圖畫
炊黍何妨得小留

湖村春興

桑柘相望雨露新
桃源自隱不緣秦
稻陂正滿初投種
蠶子方生未忌人
酒借鵝兒成淺色
魚憑雲母作脩鱗
賽神歸晚比鄰醉
一笑猶關老子身

鄰餉

結隊同秋穫
連牆聽夜春
薄持聊共飽
熟啜却煩供
炊玉吳粳美
浮蛆社酒醲
時平多樂事
莫厭數從容

久雨

風雨連旬日，屢空猶晏如。
敢言苔及榻，僅免釜生魚。
薺糝朝供鉢，松肪夜照書。
百年如此過，作計未全疎。

登山

困厄身垂老，登臨意未平。
算煙迷艸色，宿雨壯溪聲。
往古飛鴻沒，浮名脫髮輕。
平生五字律，自笑尚關情。

讀易

大易中含造化機，王何元未造精微。
乾坤要自吾身看。

臥聽雞鳴起索衣

村居書事

四十餘年食太倉
賜骸恩許返耕桑
長絲出黼尊羹美
白雪翻匙稻飯香
酒戶知貧焚舊券
醫翁憐病獻新方
春殘睡足東窓下
聞道長安依舊忙

又

藥物枝梧病漸蘇
門前野老笑相呼
春深水暖多魚婢
雨足年豐少麥奴
小飲杯盤隨事具
閒行巷陌倩人扶

題詩非復羌村句誰與丹青作畫圖

李伯時有羌村圖傳於世

春晚書村落間事

千古會稽城閭閻樂太平豐年觀米價霽色聽禽聲俗
儉憎浮侈民淳力釣耕幽詩有七月字字要躬行

雜興

秦漢區區了目前周家風化遂無傳君看八百年基業
盡在東山七月篇

又

羲和分職授人時斷自唐虞意可知獸舞鳳來餘事耳
西成東作要熙熙

又

老無添處仍逢病春欲殘時未減寒架上漢書渾忘盡
牀頭周易却常看

又

一身逋負愁賒酒滿眼關山悔上樓子細推來惟合睡
五更風雨已如秋

又

面顏日瘦口眼大氣血頓衰鬚髮癯不用凌煙寫冠劍
一蓑煙雨事春耕

又

故交零落形弔影陳迹淒涼口語心辛苦一生成底事
祈招空解誦惛惛

南堂獨坐

晨坐南堂雙眼明南山山色滿柴荆片雲忽過失簾影

急雨初來聞竹聲
鸚鵡螺深生酒興
蟾蜍滴古助詩情
野人頻約天台去
幾緉青鞋了此行

春雨示鄰曲

春來天氣苦蕭森
如縷雲升便作霖
寒溜何曾住一滴
綠陰忽已遍千林
蓴絲箭茁垂垂老
蓼浦菱塘灩灩深
聞道南山花尚在
約君攜酒試同尋

讀書

堯庭君相都俞盛
闕里師生博約深
我讀殘編食忘味

朱紘三歎有遺音

新晴賞牡丹

杜門睡榻長蒼苔
滿眼新晴亦樂哉
小市忽逢蓴菜出
曲欄初見牡丹開
不嫌雨後泥三尺
且趁春殘醉幾回
自揣明年猶健在
東箱更覓茜金栽

茜金近出
牡丹名

對酒

神僊豈易學
富貴不容求
百歲儻未盡
一樽差可謀
鐘鳴上方晚
桂發小山秋
處處多幽趣
攢眉勿浪愁

病起遇晴有作

十日春雨靈百疾投間作呻吟雖甚苦飲啗尚自若筋骸則已疲正氣亦消鑠行年垂八十所恃豈在藥魔軍累百萬指顧可盡縛君看仁義師何至用韜略川雲忽破散平地見日腳無人畫此翁縹渺立孤鶴

定命

定命元知不可移更兼狂疾固難治履穿衣弊窮居日齒豁頭童大耋時耕釣詩多悲境熟功名夢少感年衰

今朝雨歇春泥散
剝伴兒童鬪艸嬉

假山小池

鑿池容斛水壘石效遙岑
鳥喜如相命魚驚忽自沉
風來生細籟雲度作微陰
便恐桃源近無人與共尋

又

蓮嶽三峰峙桃源一路分
池偷鏡湖月石帶沃洲雲
魚隊深猶見禽聲靜更聞
巖幽林箐密疑可下湘君

春欲盡天氣始佳作詩自娛

浮雲飛盡見青天拄杖閒拈瘦倚肩
漸喜綠秧分穉耜又看畫柱圻鞦韆
雞豚雜遝祈蠶社鼓笛喧譁競渡船
惟有此翁無一事閉門贏得日高眠

自詠

生草覆蝸廬長鬚駕鹿車貧猶思施藥
老不廢觀書登覽攜童稚歌呼和里閭
躬耕亦何得聊以遂吾初

西村勞農

川雲散盡十分晴繚出溪頭信意行
片片飛花隨步遠

離離芳草上牆生村深日暖單衣爽路轉沙平兩屨輕
膳肉芬香坊酒釀因來聊得餉春耕

題廬陵蕭彥毓秀才詩卷後

詩句雄豪易取名爾來閒澹獨蕭卿蘇州死後風流絕
幾許工夫學得成

又

法不孤生自古同癡人乃欲鏤虛空君詩妙處吾能識
正在山程水驛中

舍北溪上垂釣

大耋還家萬事非
垂竿好在綠苔磯
風和山雉挾雌過
村晚吳牛將犢歸
春漲新添塘灩灩
夕雲仍帶雨霏霏
此生自笑狂顛足
依舊人間一布衣

三月二十二日作

雨過草爭出溪湍魚逆行輕舟摘蓴菜
小市聽鶯聲萬事已無夢一樽猶有情
吾兒能講學不必說無生

劔南詩豪卷五十

欽定四庫全書薈要卷一萬五千五百四十一

集部

劔南詩藁卷五十一

宋 陸游 撰

書感

頭顱已可知牙齒今復落十步或再休
吸粥不及勺身依一蒲團壁挂兩芒屨
對客輒坐睡有問莫能酢念昔少壯時
心慕宦遊樂初登平津館晚入征西幙
雨暗駱谷烽霜清散關柝登高望中原
氣已吞雍雒寧知事大

謬樵悴理征橐單車去梁益健席下沔鄂還朝見故人
大馬黃金絡後來固多士鵷鷺照臺閣婆娑郎吏間祇
自取嘲噓歷思從來事無鐵可打錯幸得還故園快若
解束縛閭里通有無情厚不為薄泥行事春耕日曝畢
秋穫隔牆喚鄰翁濁酒聊共酌

寒食

小市禁煙餘東郊展墓初桐陰覆碧井泉脉入清渠貧
悴停遊舫龍鍾廢荷鋤西窓斜日在且復勸殘書

鄉人
貧甚

者每自謂不能下
湖則其貧可知

西村算歸

天氣清和修禊後
土風淳古結繩前
村村陂足分秧水
戶戶門通入郭船
亭障盜消常息鼓
坊場酒賤不論錢
行人爭看山翁醉
頭枕槐根臥道邊

舍外彌望皆青秧白水喜而有賦

此地天教著放翁
舍傍煙樹晚空濛
一無可恨得歸老
寸有所長能忍窮
東作已趨堯舊俗
南薰方詠舜遺風

謝安勲業能多少枉是忽忽起剡中

寄題太和陳誠之秀才遠明樓

宦遊再有江西役南望廬陵每慨然未見高樓出雲雨
但驚妙語雜風煙諸公何止元和盛獨我初非正始賢筆
力深知太遠絕此詩它日勿同編

樓有榜廷秀大達所作記
及周丞相以下諸公題詠

蝸舍

蝸舍茨生草龜腸飽淖麋麥因多雨損蠶遇閏年遲徙
義憂無勇求仁戒自欺此生雖欲盡吾志未應衰

東岡

東岡竹千竿大者圍過尺微風生其間蕭蕭憂寒碧我
閒適一到散髮坐磐石萬事不累心清獻遂至夕此君
本傲世獨我有夙昔老情恐作疎時來寓琴奕

首夏

亂山深處著柴荆岸幘披衣露氣清宴坐有書聊作伴
出遊無客獨題名陰陰密樹花初盡灩灩方池水已平
幾許人間堪笑事今朝百舌頓無聲

贈曾溫伯邢德允

髮似秋蕪不受耘
茶山曾許與斯文
回思歲月一甲子
游獲從文清公
尚記門牆三沐熏
卷裏聖賢能覲面
人時距今六十年

間富貴實浮雲
二君才氣俱超絕
豈待衰翁誦所聞

自述

古井無由浪浮雲
一掃空詩書修孔業
場圃嗣幽風
懼在飢寒外
憂形寤寐中
吾年雖日逝
猶冀有新功

又

舊業還耕釣殘年迫耄期筋骸衰後覺力量夢中知客
約溪亭飲僧招竹院基未為全省事終勝宦遊時

又

屏迹歸休後願生寂寞中忍貧辭半俸學古得全功西
塢村醅釀東陂小釣通經行有佳趣稚子也能同

示客

一點昏燈兩部蛙客來相對半甌茶典衣未贖身饒蝨
治米無工飯有沙每為采菱浮野艇時因賣藥宿山家

青鞋到處堪樂興不獨雲門與若耶

對食戲作

香粳炊熟泰州紅苴甲蓴絲放箸空不為休官須惜費
從來簡儉作家風

又

米如玉粒喜新春菜出煙畦旋摘供但使胸中無塊怍
一餐美敵紫駝峯

對酒戲作

杖頭高挂百青銅
小立旗亭滿袖風
莫笑村醪薄無力
衰顏也得暫時紅

又

亂插酴醾壓帽偏
鵝黃酒色映觥船
醺然一枕虛堂睡
頓覺情懷似少年

夏初湖村雜題

市遠村深客到稀
草堂終日掩柴扉
釀成新蜜蜂兒靜
分盡殘泥燕子歸

又

嫩日輕風夏未深
曲廊倚杖得閒吟
地偏草茂無人迹
一對茭鷄下綠陰

又

寒泉自換菖蒲水
活火閒煎橄欖茶
自是閒人足閒趣
本無心學野僧家

又

日落溪南生暮煙
幅巾蕭散立橋邊
聽殘賽廟鼕鼕鼓

數盡歸村隻隻船

又

胎髮茸茸漆不如夏初安健勝春初
雙瞳嬾看公卿面却解燈前讀細書

又

從來抵死愛湖山敢料天教半世閒
杜曲桑麻雖苦薄灞橋風雪如相關

又

幽禽兩兩已成巢
新竹森森漸放梢
稻壠作陂先蓄水
野堂防漏却添茅

又

門巷蕭條長綠苔
經旬清坐罷傳杯
麴生風味那忘得
少待吾家芍藥開

吾鄉有陸家芍藥其品甚高

溪上露坐

水際風生爽拂裾
比鄰自集不勞呼
昏鴉杳杳飛初定
遠樹離離望欲無
新竹出林時解籜
小荷翻露已成珠

橋東一徑蒼苔滑歸舍還須稚子扶

北齋書志示兒輩

初夏佳風日頽然坐北齋百年從落魄萬事忌安排

徐仲

車聞安定先生莫安排之教所學益進

鄉俗能尊老君恩許賜骸飢寒雖

未免何足繫吾懷

作盆池養科斗數十戲作

小小盆池不蓄魚題詩聊記破苔初未聽兩部鼓吹樂

且看一編科蚪書

枕上

風竹無時靜月窓終夜明
時時聽驚鵲一一數殘更
吳楚民猶困燕齊寇未平
功名天所命吾志固難成

晨起

終夜厭姑惡經春無秭歸

今歲不聞杜宇

溪雲生慘慘林日澹

暉暉物外孤懷勝人間
百慮非鄰翁剡中去為我買漁衣

喜晴

葛衣初著喜新晴
寂寂虛堂一榻橫
乍坼孤花藏葉罅
晚歸雙燕拂簾旌
舞空不斷游絲直
掠地還飛落絮輕
剗欲倚闌尋好句
清笳已復動高城

讀夏書

巨浸稽天日沸騰
九州人死若丘陵
一朝財得居平土
峻宇雕牆已遽興

幽栖

何處是幽栖
城南路少西
楊花穿戶入
燕子避簾低
暮

局聊相對茶爐亦自攜溪頭雲易合晚雨又成泥

閒詠園中草木

剪刀葉畔戲魚回
帔子花頭舞蝶來
領略年光屬閒客
一樽自勸不須推

又

麝香萱草移東郭
錦子葵花買上原
兒喚乃翁閒一看
欣然曳杖出籬門

又

一樹山櫻鳥啄殘，懸鈎半舍亦甘酸。
兒童采得爭來餉，應念衰翁舌本乾。

又

綠侵小徑墓衣草，青絡疎籬鬼帶藤。
未暇開編尋本草，且將名品問山僧。

又

日高未辦續晨炊，一碗村醅且療飢。
槃箸索然君勿笑，桑間紫椹正纍纍。

又

仲夏園中百草靈風吹露圻各青青勸君辦取金鷄觜
不問昌陽與菝葜

夜雨

初夏雨淋浪簷聲繞四廊感深頭易白睡少漏偏長江
捲簾旌溼潤生衣焙香清吟欲排悶三歎不成章

晨起

海燕翩將乳戎葵粲已繁魚船初入市蓴擔未過門年

耄停朝課家貧省小飧

近以病後晨起讀書又廩粟不繼遂罷食粥

所欣行

藥處秧稻遍村村

放翁

拜賜頭銜號放翁家傳不墜散人風
問年已過從心後
遇境但行無事中
馬老豈堪空冀北
鶴飛猶得返遼東
道傍跌宕煩君看
閱盡時人臉尚紅

過隣家

老病在臂踝終日不喜動
溪雲忽過前袖手以目送
今

晨光景佳霽色入鳥哢駕言出柴荆暫作湖山夢東村
望鶴巢西阜過羅峒父老意欣然為我撥春瓮豈惟澆
舌燥亦用輒脚痛形骸去繩檢談笑得少縱吳蠶初上
簇陂稻亦已種端五數日間更約同解纓

東園

晨起東園去消磨夏日長隨鋤泉眼出上爪藥苗香琴
挂山齋壁龜搯道室牀始知彭澤令真足傲羲皇

曉出至湖桑埭

殘年孤寂不堪言時喚平頭駕短轅老氣猶能作罷臥
壯懷誰復記鴻軒櫂歌縹渺城西路煙樹參差埭北村
堪笑怪奇消未盡夜來還夢屬橐鞬

雨夜觀史

讀書雨夜一燈昏歎息何由起九原邪正古來觀大節
是非死後有公言未能劇論希捫蝨且復長歌學叩轅
它日安知無志士經過指點放翁門

雨復作

今日雲歸恰喜晴小池忽見水紋生
窓昏又輟讎書課
臥聽蕭蕭打葉聲

園中

稚竹侵簷綠新桐覆井涼閒身少羈束
隨處得徜徉
山鵲惺惚語藤花掩冉香吾詩有餘思
小復立西廂

湖上遇道翁乃峽中舊所識也

大罵長歌儘放顛時時一語却超然
掃空百局無茶敵
倒盡千鍾是酒仙
巴峽相逢如昨日
山陰重見亦前緣

細思合辱先生友五十年來不負天

老學菴北作假山既成即雨彌月不止

古者封禪歲乾封輒枯旱不言絕民食徒欲曬日觀我
今作小山纔及仞有半下瀦數斗水草木稍葱蒨蕞爾
何足言造物亦幽贊冥冥一月雨陰翳迷昏旦芳草爭
抽萌珍木亦擢榦龜魚出復沒鳥雀聚仍散彼天初何
私遺我耳目玩遂令閭巷間日厭鶉鴝喚淖深樵蘇絕
有米不能爨為小乃害大未可以理斷憂懼塞胸中當

食屢興歎培塿固易平荷鍾媿吾懦

苦雨

儘道迎梅雨能無一日晴
窓昏愁細字簷滴亂疎更未
怪蛙爭席真憂水冒城何由收
積潦簫鼓賽西成

又

煙水茫無際空堦滴不休
一窓閒隱几四月澹如秋箔
冷蠶遲績泥深麥未收
家貧村酒薄曷解老農憂

五月初作

鄰舍春新麥家人拾晚蠶推移逢夏五賦與歎朝三遣
日須棋局忘憂賴酒甌幽居有高致多取未為貪

遊西村贈隱者

水清沙淨見遊魚槐柳陰陰五月初人似登仙惟火食
俗如太古久巢居熟聞高臥常扃戶剗欲頻來共荷鋤
從此夢遊端有地淵明不獨愛吾廬

徜徉

家世由來出楚狂湖山垂老得徜徉讀書坐嬾常中廢

得句因衰已旋忘萬化隨緣寓蟲臂百年何處異羊腸
忍飢到死知無恨免使人嘲作飯囊

碌碌

碌碌初何取悠悠信所之安貧無鬼笑守道有天知暑
服黃縑製晨飧赤米炊今朝潦水退村路得遨嬉

讀陳蕃傳

莫笑書生一卷書唐虞事業正闕渠漢廷若有真王佐
天下何須費掃除

夏日晨起

華胥歸路萬山青
拈得烏藤繞舍行
兩眚尚餘殘睡美
一襟初受曉涼生
陰陰院落新桐影
寂寂房櫳乳燕聲
已罷小飧停卯酒
龜腸蟬腹不勝清

醉舞

短帽簷花舞道傍
年垂八十尚清狂
茸茸胎髮朝盈櫛
炯炯神光夕照梁
令尹閱人三仕已
太山在我一豪芒
藥苗麥飯初何欠
全取愚儒百鍊剛

北窓微陰

露滴林梢花送香風吹池面雨輸涼
蠹書一卷作老伴
麥飯半盂支日長學道莫如心自肯
杜門真與世相忘
君恩不報雖知媿稊米安能益太倉

夏夜

乞骸安晚節養疾臥空村月暗鳥鳴樹
船歸犬吠門藜羹加糝美黍酒帶醅
渾稚子能勤學燈前與細論

村居

鴨鵝穿林語鳴鵝竝水鳴餽漿憐道暍畧飯助隣耕零
落橋危斷欹斜屋半傾君母笑偷惰猶足盡吾生

晚興

羸病時時劇歡悰日日疎睡憑書紹介愁賴酒驅除小
蹇追涼處輕衫出浴初無人堪晤語且復狎樵漁

溪上

散髮倚胡牀風生水面涼單衣縫白紵雙屨織青芒

道

有青
芒屨荷葉猶微赤藤花已半黃歸來村路晚漁火耿蒼

茫

貧甚戲作長句示鄰曲

百屋堆錢四壁空，人生志願孰能同。
蕭條齒髮難藏老，冷落杯盤可諱窮。
斲筍不思鄣夏日，典衣那計禦霜風。
知心幸有隣翁在，一笑相從草莽中。

縱筆

冉冉殘年迫耄期，肱雖三折未成醫。
北山愚公世方笑，東郭順子吾所師。
萬里元非破賊手，一生無奈造物兒。

梅雨初晴湖水滿未妨把酒細哦詩

入都

葵莧登盤酒可賒豈知扶病又離家朝行打岸濤頭惡
夜宿垂天斗柄斜不恨山林淹歲月但悲道路困風沙
隣翁好為看耕隴行矣東歸一笑譁

開局

八十年光敢自期鏡中久已髮成絲誰令歸蹋京塵路
又見新開史局時

予三作史官
皆初開局

舊吏僅存多不識殘編

重對只成悲免朝愈覺君恩厚閒看中庭木影移

感舊

四十三年夢今朝又喚回平橋穿小市細雨壓輕埃老
喜詩情在慵愁史課催時時還自笑白首接鄒枚

贈陸伯政

夜窓燈火老徒勤自憫何時可策勲未喪斯文天壽我
豈無餘子我思君約通殘譜言猶在細讀新詩筆欲焚
早晚皇恩許歸去相呼同臥石帆雲

雨夜

算雨濯殘熱史官非坐曹
忍慙靡粟帛偷暇近詩騷
屋老孤燈闇風顛萬木號
明朝有奇事江閣看秋濤

自局中歸馬上口占

幼輿只合著山巖誤被恩光不蓋慙
人怪衰翁煩尺一心知造物賦朝三
飛騰豈少摩雲鵬感縮方同作繭蠶
安得公朝閑枯朽早教歸臥舊茆菴

秋雨

久占煙波弄釣舟，業風吹作鳳城遊。
不知苑外芙蓉老，但見牆陰苜蓿秋。
黃把累書俄復至，朱顏辭鏡不容留。
晚窗又聽蕭蕭雨，一點昏燈相對愁。

秋夜

庭院蕭條夜氣清，卧聽宮漏下宮城。
旅懷生怕還鄉夢，留取殘燈伴雨聲。

求月桂

重重汗簡擁衰翁，百里家山夢不通。
病眼可令常寂寞，

煩君為致數枝紅

秋思

烏帽翩翩九陌塵
杖藜誰記岸綸巾
遺簪見取終安用
弊帚雖微亦自珍
廊廟似聞憐老病
雲山漸欲屬閒身
牆隅苜蓿秋風晚
獨倚門扉感慨頻

又

霜露初侵季子裘
山川空賦仲宣樓
夢回最怯聞衣杵
病起常憂負酒籌
日月往來雙轉轂
乾坤成壞一浮漚

書生事業無多許二寸毛錐老未休

史院書懷

後死與斯文猶能讀典墳雖慙千載事要是一生勤石
磴霏霏雪銅爐裊裊雲扶衰又秋晚何以報吾君

楚辭所謂桂數見於唐人詩句及圖畫間今不復
見矣作二絕句屬山僧野人試求之

小山桂枝今所無一生到處問樵夫細思不獨人間少
月裏何曾有兩株

又

丹葩綠葉鬱團團
消得姮娥種
廣寒行盡天涯年八十
至今未遇一枝看

雨夜

細雨催扃戶
昏燈照擁衾
倦知秋漏永
瘦怯曉寒深
林鵲依簷宿
莎蟲入戶吟
此時搔短髮
誰會欲歸心

九月初作

菊佩簪繁節
物催老懷撫
事一悠哉
年光半付殘
編去

詩句時從倦枕來零落朋儔今孰在寂寥事業世方咍
兩叢月桂門前買自下中庭破綠苔

又

九月都門凜欲霜羸軀恩免立鴈行細書付吏騰初橐
和藥呼兒對古方陋巷閉門常謝客高齋掃地獨焚香
此生自計終何取似有山林一日長

實錄有初
橐二橐

又

碧海仙蓬感舊遊算年心事轉悠悠登高此去無多日

扶病重來又過秋，十里樓臺迷巷陌。
萬家碁枰戒衣裘，平生剗欠觀書債。
四庫留人未許休。

又

富貴功名未足云，平生一飯不忘君。
哦詩高韻淒金石，把釣幽情渺水雲。
落葉打窗秋已算，歸鴉泊樹日將曛。
欲知老病常多感，草帶今年減幾分。

算秋

十日都門雨風煙，已算秋甌香新菽。
栗篝煖故衣裘意。

氣臨書健形骸顧影愁何時
剡中路秣蹇憩山郵

重九不出遣懷

人生各自適飛潛魚腹熊蹯豈得兼
竝舍晚風傳藥杵小窓殘日射書籤
昏瞳但怪花爭墜衰鬢應無白可添
采菊泛觴終覺嬾不妨閒臥下疎簾

暇日

身健官閒荷主恩蕭然不異在家園
一池新墨生吟思半篆殘香入夢魂
舊友無書知獨冷小兒有命會孤騫

藜羹麤足餘何事
鍾動三茅又歛昏

憶三山

柳橋南北弄煙霏
門不常關客自稀
遣僕遠馱黃檗出
呼兒閒取白鷗歸
片雲忽起迷丹竈
潦水初生沒釣磯
一出可憐時屢變
又看刀尺製秋衣

示子聿

故山誰伴隱茅茨
幸有吾家大耳兒
雨暗小窓分夜課
雪迷長鏡共朝飢
名場未捷寧妨學
史限雖嚴不廢詩

我死汝應傳鉢袋
勉持愚直報明時

車中作

秋天近霜霰吳地少風塵
時駕小車出始知間客真
新交孰傾蓋往事漫霑巾
處處皆堪隱桃源莫問津

初寒偶出

霜氣凋闕樹晴光入市樓
閒人無造請佳日亦遨遊
湖白方新出淮臧亦易求
秋來幸無病作意試新笏

史院晚出

已乞殘骸老故丘，誤恩重作道山遊。
龍津雨過橋如拭，鳳闕煙消瓦欲流。
直舍小眠鐘報午，歸途微冷葉飛秋。
心知伏櫪無千里，縱有王良也合休。

贈洞微山人

我年六十四，獲譴輸鬼薪。
束書出東門，揮手謝國人。
笑指身上衣，不復染京塵。
時有一老翁，祝我當自珍。
却後十五年，迎君浙江濱。
我笑語是翁，豈說他生身。
事果不可知，邂逅如隔辰。
鶴髮無餘鬢，鶉衣仍苦貧。
秋風旱河

頭握手一笑新買酒烹雞豚往事得具陳試數同朝舊
零落增悲辛與翁雖俱老肝膽猶輪囷千里亦命駕何
況託近鄰秋高佳風月相過莫厭頻

九月十四日夜雞初鳴夢一故人相語曰我為蓮
華博士蓋鏡湖新置官也我且去矣君能暫為之
乎月得酒千壺亦不惡也既覺惘然作絕句記之
白首歸修汗簡書每因囊粟戲侏儒不知月給千壺酒
得似蓮華博士無

初寒對酒

晨起常教置一壺色如鵝氎滑如酥侍郎取榼不須笑
司業與錢還復酤霜路預愁騎款段雪舟每憶釣菰蒲
寒花滿帽君無笑醉倒偏宜稚子扶

午晴試筆

葉脫園林夜夜霜風和巷陌日猶長軒車但怪容孤鶴
稊米安能益太倉此去得非窮李廣向來元是老馮唐
明窓攬筆聊揮灑颯颯驚蛇又數行

夜吟

似睡不睡客欹枕欲落未落月挂檐詩到此時當得句
羈愁病思恰相兼

又

六十餘年妄學詩工夫深處獨心知夜來一笑寒燈下
始是金丹換骨時

劔南詩豪卷五十一



總校官庶吉士臣張能照

校對官庶吉士臣翟槐

謄錄貢生臣王嘉稷